

# ¿NA' SCYETZ I' JESUCRISTO?



**Originalmente escrito por el Misionero  
Enrique McArthur en 1998**

Segunda Edición Diciembre de 2019  
100 copias impresas ©  
Editado por: Josue Pérez Velásquez  
Información: (502) 5892 7644

## Yi Chusu'n yi at tul yi liwre'j

Xe'tzibil Yi Kachusun .....	1
¿Na' scyetz i' Jesucristo?.....	2
Yi Jesucristo Ite'nin I' Ryos.....	2
Yi Jesucristo i' bnol tetz cyakil yi at na i' Ryos .....	3
“Yi Jesucristo i' cy'ajl Ryos” .....	4
“Yi Jesucristo i' yi Bajx Cy'ajol” .....	5
Yi Jesucristo at nin i'-tz le xe'tzibil tzaj.....	6
Yi Jesucristo i' txumul tetz yi munt .....	6
Yi Jesucristo i' txumul ketz .....	7
Yi Jesucristo i' yi Alfa tu yi Omega .....	7
Yi Jesucristo i' elsanl stzi' Ryos.....	7
Yi Jesucristo i' yi wi'tz kapale'il.....	8
Yi Jesucristo i' yi wi'tz Rey nin i' taw cyakil yi at wi munt tu cyakil yi at tcya'j.....	8
Yi Jesucristo i' ajcaw bene'n tzi'n .....	9
Yi Jesucristo I' yi katx'ixwatz yi ja tak' Ryos .....	9
Yi Jesucristo i' yi wi'tz pujul xtisya' .....	10
Yi Jesucristo xcyek i' tan kacolpe'n tk'ab il c'ol .....	11
Tan Jesucristo na jale't tzatzin paz tetz kalma' .....	11
Wi'tzibil txolbil .....	11
Tan qui tele'n yi kachusun te ac'u'l.....	12

## **Xe’tzibil Yi Kachusú’n**

¿Na’ scyetz i’ Jesucristo? Tan lajluchaxe’n skawutz yi na’ scyetz i’ Jesucristo, chin tajwe’n cunin xcon yi Yol Kataj ka’n tan tele’n katxum tetz, nin yi mbi cunin eka’n tan I’.

Yi jun chusu’ne’j i’tz tan chiquiwixe’n cyakil yi cmon creyent, te yi Yol Kataj, na chin tajwe’n cunin yi at le kawi’ yi txolbil yi na kocsaj, bantz cya’l jopon kawutz te yi bintzij.

Te yi tiempe’j yi ato’ tul, at wi’nin wunak yi qui na cyocsaj yi Jesucristo i’ Ryos; poro yi Yol Kataj na tal sketz yi Jesucristo i’ Ryos, nin i’ bnol tetz cyakil yi at wi munt, nin tz’iba’n cyakil yi e’chk txolbila’tz tul yi Yol Kataj yi Biblia.

Quiwit bin tan xome’n te Kajcaw Jesucristo nin tyoxtu’ tan si’le’n yi Yol Kataj yi at tul yi jun chusu’ne’j.

## ¿Na’ scyetz i’ Jesucristo?

Yi Kajcaw Jesucristo yi tulake’n tzone’j wuxtx’otx’ jal wankil i’ chi tane’n ketz kawankil, poro qui nin oc i’ tetz jun juchul il chikutane’n ketz, na I’ Ryos, je na tal Yol Kataje’j tul Isaías 9:2-3, 6 Nueva Versión Internacional:

2 El pueblo que andaba en la oscuridad ha visto una gran luz; sobre los que vivían en densas tinieblas la luz ha resplandecido.

3 Tú has hecho que la nación crezca; has aumentado su alegría. Y se alegran ellos en tu presencia como cuando recogen la cosecha, como cuando reparten el botín.

6 Porque nos ha nacido un niño, se nos ha concedido un hijo; la soberanía reposará sobre sus hombros, y se le darán estos nombres: **Consejero admirable**, **Dios fuerte**, **Padre eterno**, **Príncipe de paz**.

Yi versículo 6, na jilon te yi ni’ yi ul itz’ok i’tz Jesús, nin yi bi’ i’ i’tz: Consejero admirable, Dios fuerte, Padre eterno, Príncipe de paz.

## Yi Jesucristo Ite’nin I’ Ryos

Yi Jesucristo at nin i’-tz le xe’tzbil tzaj te ntaxk itz’ij i’ te’j Mariy; at nin i’-tz poro ntaxk jal wankil i’ chi yi wankil jun wunak, na i’ Ryos nin qui’c xe’tzbil nin qui’c tzajbil i’.

Ya’stzun na tal Juan 8:58:

58 —Jun cu’n yol na wal nin scyeru’, yi ntaxk ul itz’ok Abraham, atinin westz, —stzun Jesús scyetz.

Ncha’tz na jal junt xtxolbil ka’n tul Juan 1:1-2:

1 Le xe’tzbil tzaj at jun yi at nintz yi na bi’aj <sup>1</sup>**Yol**. At nin i’-tz tu Ryos, na ite’nin Ryosa’tz.

2 At nin i’ tu Ryos le xe’tzbil tzaj.

Juan 14:8-11 na tal:

8 —Ta’, ntina’tz klo’ na kaj, yi nink xchaju’ Kataj Ryos sketz, —stzun Li’p tetz Jesús.

---

<sup>1</sup> “**Yol**”: i’tz junt bi’ Jesucristo, na tan yi yol jun, na el katxum tetz yi mbi’tz tajbil. Nin ya’stzun yi munl Jesucristo i’tz tan xchajle’n sketz yi xe’n tane’n Ryos, nin yi mbi’tz tajbil i’ ske’j.

---

- 9 —Lastum aǎ Li’p. Ja el tiemp wa’n tzixo’lwok, ¿mbi tzuntz yi qui na el atxum tetz yi na’ scyetz in? Na alchok scyetz yi na el xtxum swetz, ja tzun wi’t el xtxum tetz Intaj. ¿Nxac tzun na cǎtzan tan jakle’n tkanil Intaj?
- 10 ¿Qui pe’ mawocsaj yi junit o’ tu Intaj? Ite’nin ina’tz yi Intaj. Ej nin yi Intaj, ite’nin i’a’tz yi in. Nin cyakil yi e’chk yol yi na wal nin tzitetz, nk’e’tz in cun tu’k txumul tetz, ma na Intaj txumul tetz, na xomij i’ swe’j.
- 11 Ocswok yi ite’nin ina’tz yi Intaj. Ej nin ocswok yi ite’nin Intaja’tz yi in. Poro ko qui na itocsaj inyol, ba’n tzitocsaj tan yi e’chk milawr yi na chintzan tan banle’n.

000

Wi’nin wunak na chijak squibil quib yi xe’n tz’el katxum tetz yi xe’n tane’n Ryos, poro tan yi Yol I’ yi at cyen skaxo’l na el katxum tetz yi xe’n tane’n i’.

## Yi Jesucristo i’ bnol tetz cyakil yi at na i’ Ryos

Je na tal Juan 1:1-3 tetz ketz:

- 1 Le xe’tzibil tzaj at jun yi at nintz yi na bi’aj Yol. At nin i’-tz tu Ryos, na ite’nin Ryosa’tz.
- 2 At nin i’ tu Ryos le xe’tzibil tzaj.
- 3 Qui’c nin jun takle’n yi nk’e’tz i’ bnol tetz, na tan i’ bnixe’t cyakil yi e’chk takle’n yi at.

Ncha’tz tul Colosenses 2:9, 10 na tal:

- 9 Na cyakil yi xe’n tane’n Ryos, na jal ka’n te Cristo.
- 10 Ej nin ncha’tz e’u’ tz’aknak cu’n cyeru’ cyajtza’klu’, tan tu’ yi cyok’be’nt quibu’ tu Cristo. Na i’ txumul tetz cyakil jilwutz ajtza’kl, nin i’ yi wi’tz ajcaw squibaj cyakil jilwutz ajcaw yi ate’.

Ncha’tz tul Hebreos 1:10-12 na tal:

- 10 Ncha’tz at jun xtxolbil yi alijt cyen: “Wajcaw, ilu’ cu’san yi wuxtx’otx’ tentz. Nin ilu’ bnol tetz yi tcya’j.
- 11 Yi e’chk takle’na’tze’j soztok tera’tz, poro yi ilu’ teru’ quil sotzu’. Tz’a’toku’ tetz ben k’ej ben sak. Sbu’yink yi wuxtx’otx’ tu yi tcya’j chi na bu’yin jun be’ch ketz.
- 12 Na yi wuxtx’otx’ tu yi tcya’j, ni’cu’n tu jun be’chok yi na el te’j pe’m. Chelpon cye’tz te’j pe’m. Nin sbnixok ac’aj tcya’j tu ac’aj wuxtx’otx’. Poro yi ilu’ teru’, iǎnin atu’-tz. Qui’c quimbilu’ tetz ben k’ej ben sak.”

## “Yi Jesucristo i’ cy’ajl Ryos”

Yi ntaxk itz’ij yi ni’ Jesús te’j Mariy talnak yi ángel tetz, yi stalaje’ jun tal, nin stz’alchok tetz yi i’ Cy’ajl Ryos.

Ej nin yi je’n a’ twi’ Jesús nin yi je’n tzaj I’ xe a’, ite’nin Kataj Ryos a’lon tzaj tcyaj’:  
Lucas 2:22b

—Yi a’xatz, a’x inCy’ajl. Ok’le’n awutz wa’n. Na chintzatzin tzawe’j.

Ncha’tz ite’nin xtxolbil na jal ka’n tul Mateo 3:17 yi na tal:

Nin ben quibital jun yoltz tcyaj’ yi tal:

“Yi june’j ya’stzun yi jun tal x’utuj inCy’ajl yi wi’nin ok’le’n wutz wak’un.”

Junintzi’ cy’ajl Ryos at, qui’c junt. Nin x’chixo’l yi e’ ángel qui’c jun yi i’tzk cy’ajl Ryos, na ya’stzun na jal ka’n tul Hebreos 1:5 yi na tal:

Na qui’c nin jun tir yi jajk tal Ryos tetz jun ángel:

“A’x jun c’olaj inCy’ajl, jalu’ nno’c tetz ataj.” Ej nin ncha’tz qui’c nin jun tir yi jajk tal Ryos yi xtxolbile’j tetz jun ángel: “Nocopon tetz ataj nin yi a’xatz c’xocopon tetz incy’ajl.”

Ncha’tz qui’c jun wunak yi i’tzk Cy’ajl Ryos, ma na ntin na ko’c tetz me’l cy’ajl i’, quib na tal Juan 1:12:

Poro cyakil yi e’ yi ncyak’ ama’l tetz, ja tzun tak’ i’ ama’l scyetz tan cyoque’n tetz mero me’l cy’ajl Ryos. Na ja cyocsaj yi Yol I’.

Je junt xtxolbile’j yi na x’chaj yi Jesucristo i’ cy’ajl Ryos, Lucas 1:35 na tal:

—Qui bin c’x’bisun na cu’ul yi Espíritu Sant tzawibaj tu yi porer Ryos. Cha’stzun te yi jun ni’ yi stz’itz’ok tzawe’j, chin xan nin sbne’. Nin tz’a’lchok yi i’ Cy’ajl Ryos.

## “Yi Jesucristo i’ yi Bajx Cy’ajol”

Ja bixe’ yi cy’ajl Ryos tan toque’n tetz chik’ajbil cyakil wunak, Ryos I’, poro ja oc tetz jun wunak chi kutane’n ketz, nin yi quime’n i’ swutz pasyon, ja quim tetz k’ajbil cyakil wunak. Yi titz’e’n junt tir, ja itz’ij tu junt ac’aj wankil, nin yil tz’ul tzaj junt tir cy’a’n yi jun wankila’tz ta’n.

Daniel 7:13 na tal:

“Ncha’tz te ite’nin ak’bala’tz wil tul junt inwutzicy’ tane’n yi cwe’n tzaj jun yaj tul sbak’, icunin yi Bajx Cy’ajol. Quenin tzun bene’n ticy’le’n i’-tz te yi jun Wutzile’n Tijl C’u’lal yi c’olchij tan cawu’n.

Yi xtxolbil **Hijo de Hombre** nka Bajx Cy’ajol, chi na kal ketz le kayol, ya’stzun yi bi’aj yi xcon tan Jesús tan yolbel tib stibil tib; qui nin xcon yi yol Mesías nka Cristo ta’n, tan yolbel tib. Poro na jop yi i’ yi Mesías nka Cristo yi at tulbil. Yi yol Hijo de Hombre qui na elpont yi i’ cy’ajl jun yaj; ma na, na elpont yi i’ Ryos yi ja oc tetz wunak tan xcone’n i’ tetz k’ajbil cyakil wunak.

Wi’nin q’uixbel tan xchajle’n yi xtxolbile’j le kayol. Poro ja bixe’ tan xcone’n Bajx Cy’ajol; na ni’cu’n i’ tu jun bajx cy’ajol yi i’ k’ajbil yi Taj banak tzone’j wuxtx’otx’. Cha’stzun te ja xcon yi yol “Bajx Cy’ajol” ka’n tan traducire’n **Hijo de Hombre**.

Na elpont jalu’ yi kitz’un kutzicy kib tu Cristo; na i’ yi bajx cy’ajol. Nin yi na ko’c tk’ab Cristo na ko’c tetz nitxajil Ryos, nin na ko’c tetz titz’un Cristo.

Romanos 8:14,17 na tal:

14 Cyakil yi e’ yi na cyak’ quib jak’ ca’wl yi Espiritu Sant, e’ tzun me’l cy’ajl Ryos.

17 Ej nin tan tu’ yi o’ nitxajil i’, tz’ak’lok kaherens tan Ryos, na suki’nt ta’n sketz. Na cyakil o’ tu Cristo skacambok te yi jun kaherensa’tz...

Salmos 89:27 na tal:

Nin swak’e’ ama’l tetz i’ tan toque’n tetz Bajx inCy’ajl, nin tetz wi’tz ajcaw squibaj cyakil yi e’ rey bene’n tzi’n wi munt.

Daniel 7:13 na tal:

“Ncha’tz te ite’nin ak’bala’tz wil tul junt inwutzicy’ tane’n yi cwe’n tzaj jun yaj tul sbak’, icunin yi **Bajx Cy’ajol** (Hijo de hombre = jun wunak). Quenin tzun bene’n ticy’le’n i’-tz te yi jun Wutzile’n Tijl C’u’lal yi c’olchij tan cawu’n.

Yi xtxolbil tul Daniel 7:13 na xchaj yi Jesucristo I’ yi bajx cy’ajol yi at tulbil junt tir tzone’j wuxtx’otx’. Nin ja xcon yi yol “Bajx cy’ajol” tan Daniel tan xchajle’n yi i’tz jun wunak yi jun yi cwe’n mule’n. Nin na elpont yi i’tz yi jun yi bixba’nt tan Ryos tan tule’n itz’ok chi jun wunak, nin tan xcone’n tetz wi’tz ajcaw tetz tzone’j wuxtx’otx’.

## **Yi Jesucristo at nin i’-tz le xe’tzibil tzaj**

Apocalípsis 1:8 na tal:

Je yol Kajcawe’j: “Yi in wetz, in yi **xe’tzibil**, nin in yi **wi’tzibil te cyakil**, chi tane’n yi letra A jalen Z,” chij Kajcaw yi kaRyosil, yi jun yi at sajle’n tunintz, nin yi at jalu’, nin sbne’ opon tunintz; yi jun yi cya’l na xcye’ quen te’j.

Juan 1:1-2 na tal:

Le xe’tzibil tzaj at jun yi at nintz yi na bi’aj Yol. At nin i’-tz tu Ryos, na ite’nin Ryosa’tz. At nin i’ tu Ryos le xe’tzibil tzaj.

## **Yi Jesucristo i’ txumul tetz yi munt**

Juan 1:3 na tal:

Qui’c nin jun takle’n yi nk’e’tzk i’ bnol tetz, na tan i’ bnixe’t cyakil yi e’chk takle’n yi at.

Colosenses 1:15, 16 na tal:

15 Na ite’nin i’a’tz Ryos, yi Ryos yi qui lajluch, yi at nintz le xe’tzibil tzaj, yi ntaxk bnix jun takle’n.

16 Ej nin i’ bnol tetz cyakil yi mbi cunin at tcya’j tu yi at wuxtx’otx’. Na i’ bnol tetz cyakil yi e’chk takle’n yi na kil tuml cyakil yi e’chk takle’n yi txe’n kil. Na i’ txumul cyetz yi e’ yi ate’ tcya’j, yi e’ yi qui na kil chiwutz, yi e’ yi at ca’wl xchik’ab, yi e’ yi e’ bajxom, na i’ bnol tetz cyakil tan xcone’n tetz.

Ko ya’tz na tal Yol Kataj, ¿mbi tzuntz na kaxob tan talche’n yi o’ nitxajil Ryos?



## Yi Jesucristo i’ txumul ketz

Toque’n tzun Kataj (Jesucristo) tan banle’n yi bajx wunak. Tx’otx’ xcon ta’n, tan banle’n. Ej nin yi bnixe’n ta’n, nintzun oc juclul yi xewtz. Ma yi toque’n juclul yi xewtz, oque’n nin bantz tetz jun wunak yi itz’.

Colosenses 1:15-17 na tal:

15 Na ite’nin i’a’tz Ryos, yi Ryos yi qui lajluch, yi at nintz le xe’tzibil tzaj, yi ntaxk bnix jun takle’n.

16 Ej nin i’ bnol tetz cyakil yi mbi cunin at tcya’j tu yi at wuxtx’otx’. Na i’ bnol tetz cyakil yi e’chk takle’n yi na kil tuml cyakil yi e’chk takle’n yi txe’n kil. Na i’ txumul cyetz yi e’ yi ate’ tcya’j, yi e’ yi qui na kil chiwutz, yi e’ yi at ca’wl xchik’ab, yi e’ yi e’ bajxom, na i’ bnol tetz cyakil tan xcone’n tetz.

17 Na at nin i’-tz yi ntaxk bnix jun takle’n. Nin i’ xicyol tetz cyakil yi mbi cunin at.

## Yi Jesucristo i’ yi Alfa tu yi Omega

(Xe’tzibil tu yi wi’tzibil)

Apocalípsis 1:8 na tal:

Je yol Kajcawe’j: “Yi in wetz, in yi xe’tzibil, nin in yi wi’tzibil te cyakil, chi tane’n yi letra A jalen Z,” chij Kajcaw yi kaRyosil, yi jun yi at sajle’n tunintz, nin yi at jalu’, nin sbne’ opon tunintz; yi jun yi cya’l na xcye’ quen te’j.

## Yi Jesucristo i’ elsanl stzi’ Ryos

(Profeta)

Deuteronomio 18:18 na tal:

Por eso levantaré entre sus hermanos un profeta como tú; pondré mis palabras en su boca, y él les dirá todo lo que yo le mande.

Na elpont yi at tublic jun elsanl stzi’ Ryos (<sup>2</sup>profeta) chi tane’n Moisés, nin I’tz Jesucristo. Nin i ban xchiwutz yi e’ wunak yi I’tz Wa’n Bautista yi jun profetaja’tz. Na ya’szun na tal tul Juan 1:21.

21 Bene’nt tzun chijakoltz tetz:

—¿Na’ tzun scyetz ax̄? —che’ch. —¿Nk’e’tz pe’ ax̄ k’ajtzun Elías, yi elsanl stzi’ Ryos tentz?\*

---

<sup>2</sup> Profeta: na elpont le kayol, “elsanl stzi”

—Qui’. Nk’e’tz bin in, —stzun Wa’n.

Nin bent chijakol junt tir tetz:

—¿Nka itzun aña’tz yi jun elsanl stzi’ Ryos yi talnak Moisés yi at tulbil? \*

—Qui’, —chij Wa’n.

## Yi Jesucristo i’ yi wi’tz kapale’il

Hebreos 5:10 na tal:

Na bixba’nt i’ tan Ryos tetz jun wi’tz pale’. Nin ni’cu’n yi munl i’ tu yi munl Melquisedec.

Hebreos 7:3 na tal sketz yi ni’cu’n yi munl Jesús tu yi munl Melquisedec:

Je’nak tu jobtuj i’ (Melquisedec), na qui’c stziblal yi taj xtxu’. Nin qui’c stziblal yi xonl i’. Qui’c tkanil yi xe’n titz’e’n i’. Nin qui’c stziblal yi ko quimnak i’ nka qui’. Cha’stzun te i’ jun elsawutzil te yi Cy’ajl Ryos, na i’ jun pale’ tetz ben k’ej ben sak tane’n.

Hebreos 7:26 na tal:

Cha’stzun te e’u’ wajwutz, yi Jesús’a’tz, i’ yi pale’ yi tajwe’n tetz ketz, na chin sant nin i’. Qui’c mu’x tal paltil. Qui’c mu’x tal til i’. Nk’e’tz juchul il, nin cho’n at i’ jalen tzi’n tcya’j.

Hebreos 8:1 na tal:

I bin jalu’ yi na elepont cyakil yi ja wi’t wal scyeru’ i’tz yi at jun ketz kapale’il yi chin tz’aknak cunin. Ej nin cho’n c’olchij i’ xlaj Kataj jalen tzi’n tcya’j.

## Yi Jesucristo i’ yi wi’tz Rey nin i’ taw cyakil yi at wi munt tu cyakil yi at tcya’j

1 Timoteo 6:15 na tal:

Na tz’ul yi jun k’ejlala’tz, na tz’elepon k’ab Ryos te’j, na ntina’tz jun Ryos yi mero balaj, nin chin cham nin i’. Chin wi’tz Rey, nin chin wi’tz Ajcaw i’. (Jesucristo)

Apocalipsis 17:14 na tal sketz:

Cyakil yi e’a’tz tuml yi yaj yi i cunin txuc, xcho’yintzink tu yi Katx’ixwatz. Poro yi e’ cyetz quil chixcye’, na xchilo’onk ta’n. Xtx’aconk yi Katx’ixwatz scye’j yi e’ contra’tz, na chin chamte’n cunin i’ swutz alchok jilwutz ajcaw nka alchok jilwutz rey.”

## Yi Jesucristo i’ ajcaw bene’n tzi’n

Mateo 28:18 na tal:

Toque’n tzun xkansal tib Jesús scye’j, (apostol) nintzun taltz:

—Ak’ij wetz ink’ej tan cawu’n tcya’j, nin tan cawu’n wuxtx’otx’.

## Yi Jesucristo I’ yi katx’ixwatz yi ja tak’ Ryos

Kasi’le’ yi cobox txxolbile’j:

1 Pedro 2:24

Ej nin ite’nin Crista’tz yi icy’anin cyakil yi kil yi quime’n i’ swutz pasyon. Yi quime’n i’, ni’cu’n yi ya’tzk kaquime’n ketz swutz yi kil. Cha’stzun te qui’ct ltaj quen yi juchle’n il ske’j jalu’. Ja ke’l liwr tzak’ ca’wl yi jun ajtza’kl cachi’ yi cy’a’n ka’n. Ej nin ja kitz’ij junt tir tan kabnol tane’n e’chk takle’n balaj. Na tan tu’ yi q’uixc’uj yi tij Jesús, ja ul yos skuch’ ketz.

Juan 1:29

Itzun bantz le junt eklok, bene’n tzun tilol Wa’n yi txant tan tule’n Jesús te’j, nintzun taltz:

—Chixmayninu’ yi yaj yi tz’ule’j. Ryos nchakon tzaj tan xcone’n tetz katx’ixwatz.

Juan 1:36

Yi bene’n tilol Wa’n yi ticy’e’n cu’n Jesús, nintzun ben tloltz scyetz yi cob yaja’tz:

—Quilninu’ yi jun yaje’j yi ja icy’ tzine’j, ya’stzun katx’ixwatz yi ntab’ Ryos sketz.

Apocalípsis 5:6

Bene’n tzun wilol Katx’ixwatz. Cho’n at i’ xlaj yi jun balaj c’olchbil xchixo’l yi cyaj xchakum yi ate’ chinicy’al yi junak cyaj wi’ banl wi’. At ticy’le’n chich’ te’j yi na xchaj sketz yi quim i’. Ncha’tz wil yi at juk tuc’ nin juk bak’ wutz yi katx’ixwatz’tz. Yi juk bak’ wutz’tz, i’tz jun elsawutzil yi juk espíritu Ryos yi chakijt tzaj ta’n tan xmaye’n cyakil yi mbi na bajij wuxtx’otx’.

Apocalípsis 14:1

Bene’n tzun wilol yi Katx’ixwatz yi txiclij wi’wutz yi na bi’aj Sión. Ej nin ate’ jun cient tu ca’wnak cyaj mil wunak te i’. Yi e’a’tz at len yi bi’ Katx’ixwatz tu yi bi’ Kataj swutzak chiplaj.

## Yi Jesucristo i’ yi wi’tz pujul xtisya’

(Wi’tz Juez)

Juan 8:16 na tal:

Yi nink no’c wetz tan ma’le’n tajtza’kl jun yaj, tz’aknak cu’n lwulej ma’le’n. Na nk’e’tz inchuc yil no’c tan ma’le’n tajtza’kl, poro Intaj yi nchinchakon tzaj, i’ jun xomij swe’j, tan ma’le’n cyajtza’kl wunak.

Hechos 10:42

Nin cyaj cawul i’ o’ tan katxolil, nin tan kachajol scyetz cyakil wunak, yi i’ yi jun yi bixba’nt tan Ryos tetz pujul xtisya’, scyetz yi e’ itz’, nin scyetz yi e’ quimnake’.

2 Timoteo 4:1, 8

1 Ma jalu’ Timoteo, swutz cu’n Ryos nin swutz cu’n Cristo Jesús xchincawunk nin tzawe’j. Na txant tan tule’n Kajcaw tan ma’le’n yi kajtza’kl cyakil yi o’ yi itz’o’ scyuch’ cyakil yi e’ yi quimnake’. Txant tan tule’n i’ chi jun rey, tan kacawe’n.

8 Tan tu’ yi puntil cu’n wulej wajtza’kl, at inch’iw te jun oy. Na yil tz’ul yi jun k’ejlala’tz tz’ak’lok swetz. Nin yi Kajcaw, ya’stzun tz’ak’on tetz yi jun oya’tz swetz, na i’ yi mero balaj pujul xtisya’. Poro nk’e’tz ntin in chincambok te’j, ma na ncha’tz cyakil yi e’ yi nternin na cu’ chitzi’ tan tule’n chan Kajcaw, xchicambok te yi jun oya’tz.

2 Corintios 5:10

Na tajwe’n yil kachaj kib swutz yi pujbil xtisya’ Cristo tan kubital yi mbi tz’ak’lok sketz. Tu nin xom quen te yi mbi cu’n mbaj kabnol te yi tiemp yi nxcon kawankile’j, na tz’ocopon i’ tan kama’le’n.

Juan 5:22

Ej nin yi Intaj quil tz’oc i’ tan pujle’n xtisya’ scye’j wunak, na ja wi’t tak’ i’ ama’l swetz tan incawune’n.

## Yi Jesucristo xcyek i’ tan kacolpe’n tk’ab il c’ol

Juan 14:6

I ina’tz yi mero be’. Ej nin i ina’tz yi mero bintzij. I ina’tz in itz’ajbil. Nin cya’l jun tz’opon te Intaj yi qui’k in.

Juan 14:13, 14

13 Na tzimbne’ cyakil yi e’chk takle’n yil tzijakwok tan imbi’, tan lajluchaxe’n yi k’ej Intaj.

14 Na kol cxo’c tan jakle’n alchok scyetz takle’nil tan imbi’, swak’e’ tzitetz, —stzun Jesús bantz scyetz.

1 Timoteo 2:5

Na ntina’tz jun Ryos at, nin ntina’tz jun kayolol at skaxo’l tu Ryos, i’tz Jesucristo yi jun yi ncha’tz wunak i’.

## Tan Jesucristo na jale’t tzatzin paz tetz kalma’

Juan 14:27

“I bin jalu’, yi ntaxk na’j, na waj lwak’ cyen xtxaxl walma’ tzitibaj. Tetz cu’n walma’ yil wak’ cyen. Na nk’e’tz in la’j, chi quitane’n yi e’ mas wunak yi qui’c na cyocsaj. Cha’stzun te, yil na’j quil cxbisunwok, nin quil cxobwok.

Mateo 11:28, 29

28 Ma jalu’ bin, cyakil yi e’u’ yi k’e’xnake’tu’ jak’ cyektzu’, chisajku’ tzinwutz, xchu’jeku’ wa’n.

29 Cho’ku’ jak’ inca’wl. Che’ inchuse’u’ chi na ban jun wacx tan xchusle’n yi tuch’. Na wi’nin impasens tan chichusle’nu’. Pe nin sk’il wulej chichusle’nu’, nin sjalok tzatzin paz tetz cyalma’u’.

## Wi’tzibil xtxolbil

- I bin jalu’, ja kil yi qui’c jatxbil xo’l Ryos tu Jesucristo; ma na ite’nin i’a’s.
- Nin ja ulak tzone’j wi munt tan xchojle’n cyakil yi kil.
- Chumam banl talma’ i’ skibaj, cha’stzun te quil kacabej kac’u’l tan koque’n jak’ ca’wl i’, nin tan kaxcone’n tetz, na at jamel quikan cyakil yi e’ yil cho’c c’ulutxum jak’ ca’wl i’.
- Kol kaxom te’j, skacambaje’ jun itz’ajbil yi qui bajsbe’n tetz.

Ko ja pujx awa’n yi mbi eka’n tan Jesucristo, nin na awaj yil cxo’c jak’ ca’wl i’ joyaj jun pastor tan toque’n tan awuch’eye’n.

## Tan qui tele’n yi kachusun te ac’u’l



¿Mbi’tz tajwe’n kaban tzone’j? Na taj si’le’n yi mbi’tz na jaktzaj, nin ba’n tz’ibxij le yi ama’l yi at cyen.

1. Tul Juan 1:1-2, ¿na’ scyetz i’ juna’tz yi a’lchij Yol tetz? \_\_\_\_\_
2. Tul Juan 14:8-11 na jilon te yi Jesucristo ite’nin i’a’tz Ryos, poro tan lajluchaxe’n más skawutz yi Jesucristo i’ Ryos mbi’tz bnix ta’n tan lajluchaxe’n xchiwutz wunak yi i’ mero Ryos, quib yi na tal tul versículo 11? \_\_\_\_\_
3. Colosenses 2:9 na tal yi cyakil yi xe’n tane’n Ryos, na jal ka’n te? \_\_\_\_\_
4. Quib na tal tul Colosenses 2:10 ¿Na’ scyetz txumul tetz cyakil jilwutz ajtza’kl? \_\_\_\_\_
5. ¿Mbi versículojil na jale’t? “Yi axatz, ax inCy’ajl. Ok’le’n awutz wa’n. Na chintzatzin tzawe’j.” \_\_\_\_\_
6. Quib na tal Juan 1:12 ¿Xe’n na ko’c tetz mero me’l cy’ajl Ryos? \_\_\_\_\_
7. Le castiy i’tz Hijo de Hombre. Ma le kayol ¿mbi’tz yi traducción? \_\_\_\_\_
8. ¿Mbi na elpont Hijo de Hombre le kayol? \_\_\_\_\_
9. Na’ a’lon: “...in yi xe’tzibil, nin in yi wi’tzibil te cyakil...” Ap 1:8 \_\_\_\_\_
10. ¿Mbi na elpont yi yol profeta? \_\_\_\_\_
11. Quib na tal Hebreos 7:26 yi ketz wi’tz kapale’il ¿i’tz pe’ Melquisedec nka Jesucristo? \_\_\_\_\_

12. Tul 2Cor 5:10 ¿Na’ taw yi pujbil xtisya’? \_\_\_\_\_

13. Quib na tal 1Tim 2:5 ¿Na’ scyetz i’ yi kayolol skaxo’l tu Ryos? \_\_\_\_\_

14. Tul Juan 14:27 at cob xtxolbil yi cyaj tlol Kajcaw tetz ketz: \_\_\_\_\_

15. Tz’ibcu’n tzone’j yi mbi na tal Juan 14:6  
\_\_\_\_\_  
\_\_\_\_\_